



Comhairle an
Aontais Eorpaigh

An Bhruiséil, 16 Aibreán 2018
(OR. en)

7925/18

CYBER 62
COPS 90
JAI 310
COPEN 97
DROIPEN 50
RELEX 313

TORADH NA nIMEACHTAÍ

Ó: Ardrúnaíocht na Comhairle

An: 16 Aibreán 2018

chuig: na toscaireachtaí

Uimh. an doic. 7517/18

roimhe seo:

Ábhar: Conclúidí ón gComhairle maidir le cibearghníomhaíochtaí mailíseacha -
formheas

Gheobhaidh na toscaireachtaí, san Iarscríbhinn a ghabhann leis seo, conclúidí ón gComhairle maidir le cibearghníomhaíochtaí mailíseacha, arna nglacadh ag an gComhairle Gnóthaí Eachtracha ag an gcruinniú a bhí aici an 16 Aibreán 2018.

Conclúidí ón gComhairle maidir le cibearghníomhaíochtaí mailíseacha**Ghlac Comhairle an Aontais Eorpaigh na conclúidí seo a leanas:**

Cuireann an tAontas béim ar a thábhachtaí atá cibearspás domhanda oscailte saor cobhsaí slán, ina bhfuil feidhm ina n-iomláine ag cearta an duine agus saoirsí bunúsacha agus an smacht reachta, ar mhaithe le folláine shóisialta, fás eacnamaíoch, rathúnas agus iomláine ár sochaithe saora daonlathacha.

Meabhraíonn an tAontas a chonclúidí maidir le creat don fhreagairt chomhpháirteach thaidhleoireachta ón Aontas ar chibearghníomhaíochtaí mailíseacha^[1] atá ina rannchuidiú[...] chun coinbhleachtaí a chosc, ar mhaithe le comhar agus cobhsaíocht sa cibearspás trí bhearta a leagan amach laistigh den chomhbheartas eachtrach agus slándála, lena n-áirítear bearta sriantacha, ar féidir úsáid a bhaint astu chun cibearghníomhaíochtaí mailíseacha a chosc agus a fhreagairt.

Cuireann an tAontas in iúl gur údar mór inní dó an méadú atá tagtha ar chumas agus ar thoilteanas tríú stát agus gníomhaithe neamhstáit a gcuid cuspóirí a shaothrú trí dhul i mbun cibearghníomhaíochtaí mailíseacha agus leanfaidh sé air ag neartú a chumais tabhairt faoi chibearbhagairtí. Aithníonn an tAontas go bhfuil gá, de bharr cineál idirnasctha casta an cibearspáis, le hiarrachtaí comhpháirteacha ó rialtais, ón earnáil phríobháideach, ón tsochaí shibhialta, ón gcomhphobal teicniúil, ó úsáideoirí, agus ó lucht léinn chun aghaidh a thabhairt ar dhúshlán agus iarrann sí ar na geallsealbhóirí sin na freagrachtaí sonracha sin atá orthu a aithint agus a ghlacadh chucu d'fhonn cibearspás oscailte, saor, slán agus cobhsaí a choinneáil.

Cáineann an tAontas go géar úsáid mhailíseach teicneolaíochtaí faisnéise agus cumarsáide (TFCanna), amhail in *Wannacry* agus *NotPetya*, a rinne damáiste agus caillteanas eacnamaíoch suntasach san Aontas agus níos faide i gcéin. Déanann teagmhais den chineál sin an cibearspás agus an domhan iarbhír araon a dhíchobhsú ós rud é gur fusa míthuiscint a bhaint astu agus go bhféadfaidh siad cúrsaí a chur ag imeacht in ainseal. Cuireann an tAontas i bhfios go bhfuil úsáid TFCanna chun críocha mailíseacha doghlactha os rud é go ndéanann sí dochar don chobhsaíocht, don tslándáil agus don leas a chuirtear ar fáil leis an idirlíon agus le húsáid TFCanna.

[1] 9916/17.

Coimeádfaidh an tAontas den seasamh go bhfuil an dlí idirnáisiúnta atá ann cheana infheidhme i gcás an chibearspáis agus cuireann sí i dtreis go bhfuil urraim don dlí idirnáisiúnta, Cairt NA go háirithe, bunriachtanach chun an tsíocháin agus an chobhsaíocht a choinneáil. Cuireann an tAontas i dtreis nach mór do stáit gan ionadaithe a úsáid chun gníomhaíochtaí éagóracha idirnáisiúnta a dhéanamh trí leas a bhaint as TFCanna, agus ba cheart dóibh a áirithiú nach mbainfidh gníomhaithe neamhstáit úsáid as a gcríoch chun gníomhartha mar sin a dhéanamh, mar a léirítear i dtuarascáil 2015 ó Ghrúpaí Saineolaithe Rialtais na Náisiún Aontaithe (UNGGE) i réimse na faisnéise agus na teileachumarsáide i gcomhthéacs na slándála idirnáisiúnta.

Cuireann an tAontas i bhfáth go gcuireann comhlíonadh na ngnásanna deonacha, neamhcheangailteacha maidir le hiompar freagrach stáit sa chibearspás le timpeallacht TFC atá oscailte, slán, cobhsaí, inrochtana agus síochánta a bhaint amach. Cuireann an tAontas i dtreis nár cheart d'aon Stát gníomhaíochtaí TFC a dhéanamh atá contrártha dá n-oibleagáidí faoin dlí idirnáisiúnta ná nár cheart dóibh tacú le gníomhaíochtaí den chineál sin go feasach, agus nár cheart dóibh cead a thabhairt go feasach úsáid a bhaint as a gcríoch chun gníomhaíochtaí mailíseacha a dhéanamh lena mbaintear leas as TFCanna mar atá sainráite i dtuarascáil 2015 ó UNGGE.

Cuireann an tAontas in iúl go bhfuil sé toilteanach leanúint ar aghaidh leis an obair chun gnásanna, rialacha agus prionsabail dheonacha, neamhcheangailteacha maidir le hiompar freagrach stáit sa chibearspás a fhorbairt tuilleadh agus a chur chun feidhme, mar atá sainráite i dtuarascáil 2010, i dtuarascáil 2013, agus i dtuarascáil 2015 faoi seach ó UNGGE, agus faoi chuimsiú NA agus na bhfóram idirnáisiúnta eile iomchuí.
